

郭  
大  
理  
遺  
稿

郭大理遺稿卷五

文三

目錄

思無邪齋自箴

鄭雲麓小天荆庭快聚圖記

汪子芸詩序

浣月齋印譜序

封荻塘集印序

陳秋河時文序

送趙象菴舍人歸里小序

王春甫師八十壽序

英煦齋師五十壽序

白小山師六十壽序

廖陸峯先生七十壽序

林暘谷太翁七十壽序

蔚亭鄭先生六十壽序

郭大理遺稿卷五

文三

思無邪齋自箴

嗚呼耳曠於聲目眊於色蓋寡過之難也余春秋二十有八矣幼頗不好弄特尠與物接過與否曾弗自覩歲丁卯始隨計吏集都下又二年釋褐出門日以久愆尤日以滋或失口於快心或忤目於眄睐其仁且恕者或哀余之愚其嚴且正者將怒余之妄又且性識疎短常懼爲物所中蓋不啻於車懲覆於淵鑒沉也昔昌黎五箴其言深而悚伊川四箴其言安而

重余竊取二先生之意以自訟同年生陳春溟大令  
能愛余者輒以質之

鶴鷗之嘯鸚鵡之歌皆以言而羅汝言時失汝弗時  
知告汝以悖乃惟汝師人弗汝告汝將由之汝言而  
忘人將讐之吁嗟乎汝氣則凌汝言則煩汝不見金  
人緘其口而銘其背曰摩兜韃慎莫言

疇姝伊優汝樂其柔其若強弗汝色斯艷有醇其醜  
持將汝飲射工銜沙伺汝沉影吁嗟乎槩迷棹楫固  
非檀而未傷鈎吻類黃精其毒乃長吁嗟乎懸度之  
阪不可越羅刹之流不可沒人情嶮巖不可忽

鸞飛乃文鼠拱乃禮沐猴而冠乃愆汝止汝動而易  
人具汝視汝言而易人具汝戲吁嗟乎君子恥有其  
服而無其容汝曷弗言之從汝曷弗儀之雍

吁嗟乎汝之氣剛以偏旣逞爾欲又不幸而盛年宮  
缺隅而居牆隙陟而圯匪謙曷益匪虔曷祉搖搖乎  
余惟汝危汝覆狂以喜

汝昔之時布被則溫脫粟則旨將飢寒之恤而遑論  
其美謂汝知儉而胡萌侈亦欣醲亦豔紈綺令汝  
得志汝欲何底吁嗟乎汝先之望汝者如楊伯起尙  
樸之循而華之恥

鄭雲麓小天荆庭快聚圖記

長林萬始陸士衡之行思陽羨始興劉孝標之惜別  
豈不以因心則友言面無因者乎此鄭雲麓二兄荆  
庭聚慶圖所爲作也圖中爲室一楹檐外三荆靚紫  
若繡左坐者爲哲兄銘亭君右坐者爲令弟曉亭徧  
步流觀者雲麓也夫其承萬石之淳規秀三珠而駢  
曜浦陽家法長無鴉影之分康成詩箋別會鹿鳴之  
感一卷之奇共賞一味之甘迭嘗義竹敷林芳蘭茁  
砌花驗和氣樹必連枝煌煌庭陰嚶嚶谷鳥于時樂  
矣旣而雲麓舉秋賦雋春官鳳池翱翔鶴廳敷厯施

友于之政飛籍甚之聲顧美景良辰未嘗不覽圖神  
注也夫金友玉昆大衾長枕習於歡聚以爲可常逮  
寫入縑緙攜同琴劍形贈影畚夢相裒哀弟瘦兄肥  
容睡彷彿傳神阿堵含毫邈然此則覩鷓鴣之獲飛  
羨頻伽之共命者矣且都下勝友如雲今舊皆雨每  
憑邱壑寫及苔岑張修禊之圖仿過關之卷雲麓獨  
逸馳想企興言孔懷常棣之章詩中有畫白雲之岫  
天外數峯假若銘亭曉亭促駕而來相視而笑可指  
畫幀證此寤言先萬里客遊八年鄉思結望雲之悵  
遲聽雨之招渺渺余懷星星在鬢披斯圖益憬然會



也

汪子芸詩序

子芸汪君出詩示余瓏玲其聲雋拔爲主興來如答  
采振欲飛余方病疽伏枕卒業不禁躍然興也蓋詩  
做久矣拾唾於西江借面於北地襞積者滯寔縹眇  
者遁虛歧中有歧道其所道自喬宇鬼瑣之士倡性  
靈嗚噓之風滄海橫流江河日下儂薄爲態纖側望  
憐闐闐之猥能令公喜牀簀之狎可對人言豈知鹿  
女鳩媒總是求賢之喻碧城錦瑟半皆感遇之詞不  
灌醜酬徒尋糟粕聚成邱貉身墮野狐卽無慮於抽

腸獨不防夫犁舌乎子芸承名父之樸學有奇童之  
美聞銳銀旭厯心契於九宮楚仇飄蜀志諧於四子  
山河兩戒身爲記里之車風雪三餘胸是謨觴之藏  
故能肖天秀揚妙音而於峽帖之吟移華之咏皮陸  
之贈答元白之離居假墨圖心以手爲口固知薄伽  
所授不怖於波旬亥旣孤明無迷於象罔也夫琴之  
至者清思助萬籟蕭蕭數峯自青江月爲白若雷  
大使之鍊綽康昆侖之琵琶則聒矣畫之至者荆關  
深邃董巨雄奇摩詰雪不妨蕉雲林蘆可爲竹若紅  
衣以着漁父金眼以飾將軍則駭矣子芸撫絃動操

有王月宮之聲舐墨吮豪有黃一峯之法古淡居最  
詩律亦然僕固不辨淄澠言或未爲河漢焉嗟乎是  
丹非素甚矣俗之移人臨水登山悲哉秋之爲氣與  
君別矣爲我藏之勿令高才之士集矢於拘墟且謂  
老生之談濫觴於擊壤也

浣月齋印譜序

周肇璽書漢課繆篆源流斯遠刻畫間存碧樹交柯  
赧虹引其采元珠在佩琚瑀增其珍所以五鹿之謠  
人不皆可尙四羊之奏文不盡無訛而淳古自殊英  
光必炳至今相代文質以時籀史未備而別撰法

盧則水田衣矣陽文自倭而必效醜醜則葵邱鼎矣  
以黑爲青是丹非素謂北斗書碑不畏二十八宿笑  
乎芑堂先生集印八卷研精六書兼綜羣詁擇言尤  
雅數典不忘吞鯨吐鳳時謂無倫截鵠續鳧古曰在  
昔如入耆崛種種莊嚴如上增城往往見寶蓋鑿石  
先觀鑿迹飲水必溯洑源曹言書性情存乎使轉  
洪谷論畫氣韻在於天成此則二十二體坏冶在心  
三十五舉筌蹄皆迹矣庭院蕭閒風日清美雷桐再  
鼓峿苑一旗坐盤陀展寫縛作句圖觀可也作林統  
讀可也

封荻塘集印序

荻塘先生既賦杏花便招叢桂著書盈屋則耒耨硃  
砑之篇教子一經則賀世提扶之響嘗出集印二冊  
示余蓋令嗣右孫所摹而荻塘是正者也美矣茂矣  
其諸所謂望今制奇參古定式者歟夫聖章之作俶  
落蒼姬行李以苻之府藏以揭之春秋戰國鑄刻乃  
繁秦餘九字之章漢重六體之教剝泐光發急就文  
斜厭勝則黃神越章市易則千金日利纍纍入握一  
一尋源翡翠屑金銀鏤切玉龍蟠鳳翥截鵠續鳧有  
物渾成意外巧妙翫其淳古證五鳳之輒錄其繆文

訂四羊之奏所以種蕉開士草書檢司馬之章呪米  
真人符籙守都功之印斯傳斯愛謂有取爾自唐以  
來浸成鬼瑣萬言方寸已成烏有之稱三藐毋默忽  
撫佞盧之字軒名別號陳陳相因賞鑒收藏紛紛不  
已至或銀擣腰鼓更無醫俗之方烏篆蟲文半涉字  
妖之誚不今不古角馬童牛倒之顛之天吳紫鳳雖  
竇泉述書而詳印驗吾衍學古而訓雕鐫遺迹間存  
無得而稱焉有明中葉漸究鈇規青田昌化比于闐  
采玉之歌何震文嘉有宜僚弄丸之技貽于好古吳  
氏有印譜之篇採自近今周氏有印人之傳若林鶴

田許實夫近世翹楚也林則豐容宛轉有休承之思  
許則清麗芊眠得雪漁之趣菰塘迹求憲履青竟出  
藍醞醐愈甘驩駟欲度凡翼輔佐卿之刻大沈亞駝  
之文琅琊嶧山之遺天發碧落之迹造化在手坏冶  
一陶若扁之斲輪若慶之削鏐巧密均間以悟長史  
之傳寸馬分人以會河陽之訣通師書秀元暉畫奇  
技也乃疑於神子能得之於父夫菰塘思如平子文  
似相如伯生高詠衛青白玉之章虞監研書逸少黃  
銀之印九天珠玉咳唾皆珍七寶樓臺彈指卽現集  
印其小者耳山谷論書曰人品高洪谷論畫曰氣韻

勝世有請觀鄭客之削願度薛孃之針者乎余將甚之

陳秋河時文序

著雍之年中榆之月欲雪不雪今雨莫來若煙非煙  
停雲在望有客宿宿有車麟麟則故人陳秋河以病  
愈來都也體中何如別來無恙坐未暖席袖已出詩  
高歌有神清論如樂繼乃出偶存一帙示僕謂宜爲  
序則皆與僕同學時所爲文也君知我者僕何人斯  
敢以卽炤之炤競仙足之蟾揚琴之哈着佛頭之糞  
乎顧念僕與君從萬虞臣先生遊時君才逾冠僕甫



成童論道小山鑄人大冶太學陳郭固慚比肩漢宮

尹邢未須避面君時文采葩流聲華鼎盛明瓊出手

六子皆紅龍泉在腰一揮畢白

君爲諸生六試再優等四冠軍

而僕

無奇碌碌不畀區區三斷三登自歎爲秦堊父五戰

五走知我者鮑叔牙謂僕爲賀若琴謂僕爲韓陵石

也旣又因讀書於擢英書院丹蘄九轉屋共兩頭若

夔憐虻如形贈影燭時見跋或籠徐吾之燈井有寒

泉分抱莊生之盃已而月中記典鳴鹿高秋日下賞

文雕蟲過夏糠燈一盃蓋粥四分秋雨頽垣屋隨舟

泛曉風低唱鬼笑人癡互爲一字之師譬彼雙聲之

曲爾乃鯉皆登峽鳧已飛霞暫聯木蘭之舟便作楊柳之別齊州九點海水一泓天外數峯廬山五老音書簡隔世事侵尋君則元亮論田僕則王褒奉使君則鍼仍度世僕則筆已還人昔年氣盛妄思成一家言今日心降何止臥百尺下哉嗟乎廿年彈指夢去無痕一卷印心獵見猶喜溯將陳迹分明印雪之鴻示彼後生珍重識途之馬君驥足重展龍文獨扛水吸口於西江官繼蹤於北地子長才高而識亦高王令官進而文亦進僕愧聞道百請避舍三矣倘薄宦粗成舊業重理水哉水哉願與投璧而盟歸歟歸歟

無爽結鄰之約再披昔帙兼話今遊意亦里都之譚  
資禪門之公案哉至君文之美則懸呂覽於國門證  
華嚴之法界僕於無佛處稱尊久矣辭不備云

送趙象菴舍人歸里小敘

道光三年歲在癸未中書舍人象菴趙君謁告歸里  
或曰象菴歷官三十年皆書中考年勞次遷今歲當  
得主事顧乃憶猿鶴之招謝鵷鸞之侶錢公勇退希  
夷疑其神仙疏傅祖行漢代傳爲圖畫象菴恬退士  
歟高隱流歟白纓雲博士過其友尙先言曰謂象菴  
恬退知象菴矣而未盡也夫其薇省早登蘭芬愈郁

聲華藉甚望實隱然蔣濟欲召嗣宗王翰願隣子美  
苟思展驥足則士元立得治中卽盧奪鳳池則馮唐  
豈老郎署况乃宰相有翹材之館將軍有長揖之賓  
位重者不拒掃門之人道廣者或答望塵之拜門托  
桃李則庭升芷蘭朝學吹笙則暮希拔宅蓋千金之  
驥必自呈於孫樂之前五侯之鯖不先貺於駢菜之  
餓也君乃踽踽涼涼落落莫莫側足掌故之列分粟  
侏儒之囊桐百尺而無枝刺三年而已減官曹多暇  
書卷自隨時飲一杯時歌一曲一畝之室分半爲園  
四時之花更番在檻名節當如樹木安樂可以驗人

抱瓮自勤不識機心機事折柬相命維有元演元丹  
由是言之象菴城市而有山林之思簪纓而有蘿薜  
之適讀傲吏之書爲逸民之懷久矣夫元亮束帶而  
歸其輕出之悔也貞白掛冠而隱其干祿之舛也平  
子歸田之賦有託而辭榮公理樂志之篇虛擬而非  
實象菴踐清班逢

盛世其事雖類其心則殊直以神禪爲懷飛翔將倦  
青山有約白雲無心水哉水哉流與止其適然歸歟  
歸歟仕與隱其安擇必謂鎔銖軒冕錮疾煙霞豈象  
菴哉余慨夫崇讓之論鮮聞嗜進之風或覩願爲誦

止足之傳書遂初之賦也輒綴蟲篆以代驅歌白露  
已濡黃華將曜塵中走馬更無命酒之區天外飛鴻  
猶冀附書之便爾

王春甫師八十壽序

翊五期之聖者必隆三壽之朋騁九駁之衢者必演  
五龍之算遜稽前牒厥有徵郵八百三十齡商大夫  
之斟雉三千六百鈞齊尙父之飛颺柱下相君書曾  
緒正香山退傅身入畫圖所以言導納者未數偃佺  
蘄縮綽者多稱召奭非謂六身二首無藉於庾詞三  
老五更獨有其嘉尙者哉宮保夫子鳳苞麟定玉粹

身大玉... 卷二  
金貞翠巘九華卽是崧高之嶽文昌六宿寔鍾旗翼  
之精旣遂初衣丕增麋壽歲在乙亥開八秩矣  
聖主顧念老成彌隆

恩禮特命蓮府少宗伯於二月初吉撰日稱壽

錫子便蕃

溫諭周摯于時朝英省美動色相趨旣頌

天子惠下之仁

眷賢之篤而又以見我夫子之德得於天者全契於  
聖者久也今夫於水見黃河之大而千七百渠之受  
不能沿於山見泰山之高而七十二代之基不能躡

何則語大者難爲狀舉博者莫爲名也先等詞不足  
逮意智不足知師顧念詩人栲杵之章欲附童子揚  
琴之曲夫其北海早慧大年工文十二歲之神童冊  
萬言之文史長離振采洪鐘發音旣雋南宮遂躡東  
觀一貳司成再轉宮尹珥筆而從

六御獻講而直

三天凌雲之氣適晝日之光爛繭紙增直而寫其賦  
雜林累譯而市其文則夫子之文學也若夫璇柏之  
淵懷珠自媚赤堇之土拭劍有光不遇孫陽則驪黃  
滯矣匪逢永叔則軋茁訛矣夫子秉金心持玉等淄



澠合而辨其味睢渙交而觀其文凡視學者三典試者四會試總裁者一分校者一入網則珊瑚鈎應琴則黉賓鐵陸贄之放進士世謂得人宰我之頌仲尼非云阿好則夫子之鑒裁也身者親之支孝者德之本夫子汲汲乞身烝烝色養白華絳足門子之錯磨青綬銀章嬰兒之啼笑中衣羈膾不以任婢獲之勤持杖將車不以易鼓吹之盛則夫子之內行也

聖主賢臣之頌延年美意之符四嶽雲興

三霄露重納言旣拜邦禮旋釐甫長執法之臺卽曳尚書之履盟心於水被澤如春步趨省闈百辟視而

儀型保傳端闡帝子爲之設拜鹿鳴琴瑟時賡帝軫  
之風鶴禁簪裾屢預正衙之宴則夫子之榮遇也至  
若宋祁譜宰臣之繫以繼起爲難韓億劭教子之功  
以並列爲盛少宗伯擢巍科厯清秩使星肆出卿月  
有輝當夫歲旅焉逢

鸞臨玉署觀橋觀梓拜後拜前便設雲母之屏同聽  
鈞天之奏九重亦褒其弓冶四海直比之星雲則夫  
子之式穀也夫以貞粹之德若此懽龐之祐若彼而  
猶衛侯抑抑姬公匆匆江海譬其淵冲林木飭其名  
節銅行無改冶之以鑄人肉味自甘忘之於說士又

復安神禪砥廉隅作相希文彌憶圭峯之粥歸田君  
實不營洛下之園孫曾則課以菜根衣飾猶仍於澣  
布蓋水澄則月止火壯則煙微由以氣海長溫谷神  
不老周銘曰恭則壽道經曰逸則壽壽者酬也斯之  
謂矣所願長樂無極椿八千歲以爲春遲日孔陽桃  
三千年而一實爲地行仙重預華筵之千叟自  
天上施永錫洪範之九疇

英煦齋師五十壽序

在天成象紫軼翼以戴匡惟

帝念功丹彝煥其膺績九德咸事而隆寄在執衡者

大匠之董斤削也三壽作朋而盛祉如集穀者泰尊  
之考枹鼓也篤生則維嶽之吟眉壽則有臺之頌在  
昔有之於今信之書讀二十年以前更發瑯嬛之鑰  
鵬搏九萬里而上遂排閭闔之雲旣雋禮闈便登詞  
省頌陳神雀

宸筆賞其鴻文詩唱叢雲中禁稱爲才子端闈翔步  
祕閣聯行金城湯池則□君之議禮重差夕桀則季  
相之司元印佩水衡釐尙方之監作旨承樞密謹夙  
夜之納言職兼琳館寶書總按勩之成官長玉堂

宸翰勵清華之品執金吾之仕宦環列肅於熊羆大

冢宰之會成稱心平於雀燕往者平田蚨伏野社狐  
鳴羣醜已芟渠魁尙蟄師指揮悉中聲色不形鑄九  
牧以照奸役六丁而縛魅狡兔之三窟無遺飛颺之  
五技皆窮膽定通身目不及瞬

綸言褒贊旌其借箸而籌部屋騰懽喜於開戶而臥  
此吾師之功彰彰共覩者也若夫書笏罄心伏蒲造  
膝謏猷入告而溫樹不言幹運未彰而蹊桃共信矣  
至乃玉尺銓才銅筮澄鑒十行俱下九變知言中郎  
識曲而桐竹罔淪王爾操斤而檀檣皆諦固劉幾亦  
頌永叔非宰我敢私仲尼焉又若時平事少公退務

閒漏滴春遲爐香風駐花竹安樂圖書璘璣戲翠掣  
鯨則雞林之估購集游鴻舞鶴則渤海之使乞書此  
則諸葛勳崇還稱名士希文位重不異秀才者也我  
師母大人玕璜著懿蘭蕙徵芬春月名談清風穆誦  
逆作與班昭齊軌染翰共衛鑠同蹤哲嗣玉庭端尹  
芝圃銀臺軼轍聯才韋平繼業方西清之奉筆時號  
二難已東岱之興雲將潤六字師之業盛矣師之祚  
宏矣夫白山磅礴而鬱積綠江泮渌而揚波大之爲  
帝錄之昌分之爲國楨之挺是以傑人代出喬木咸  
瞻然銘旌鼎者或未暇於詞章珍翰墨者又稍殊於

勳伐固知能文能武自古所希立功立言兼擅未易  
至乃金鑾祕署傳子傳孫雲母珍屏拜前拜後則尤  
百餘年未可一二數也且夫緣鼎作相鈞璜稱師凡  
爲佳話皆在耆年近而稚圭晚節始開畫錦之堂君  
實宏施已入洛耆之會而吾師樹立之隆如彼春秋  
之盛如此踐揆席亮泰階湛露渥乎九乾大園擎於  
八柱汾陽二十四考星辰告富貴之徵成鳩萬八千  
年上宰襄仁壽之域某等稱觴而前又奉觚而俟也

白小山師六十壽序

拔地摩空之嘯學者莫至於山浴日沐月之波觀者

固難爲水然而部婁之樅思植於堂密者詹印之意  
專也切堂之芥冀泛於鯢桓者朝宗之願結也青龍  
戊子十有二月實惟老夫子大人六十攬揆之辰曩  
歲攝提格師開六秩時尙先嘗以揚琴之音申祝純  
之祝晞尹之願幸遘於生申鑄顏之訓冀托於報束  
其於吾師撻洛鉤河之學染藍琢玉之修神雀頌之  
恩褒金蓮燭之寵遇片縑甫寫勃海之使爭收一什  
新成鷄林之相能誦採閩山而登棠梅莅皖水而擢  
秀翹雖寡智不足知師而悉數乃留更僕第以宮僚  
職暇書局望清固揚黼藻之光未預燮諧之任蓋昔



陽初慮之響必叶以箭磬之九奏而後廣樂鏘洋也  
昌光握譽之輝必綴於戴匡之六符而後清陽照燭  
也今秋尚先有蜀中之行往辭於師跽而請曰粵東  
土沃民逸地大物博蟬固歸火蟻或慕羶瓦衣不能  
禦漸至之濡饒室無以備無方之矢吾師容光必照  
視遠惟明曳白者自慙勒紅者亦感所揜何術其效  
甚神師教之曰無惡於人人恒愛焉不疑於物物亦  
誠焉度已以繩接人用繼鶴長鳧短各視其材鵠白  
烏元不渝其質黠賓之鐵躍自應聲夷則之銅照無  
畜影青天白日奴隸知其清明大壑深山龍虎神其

變化小子勉之至哉言乎吾師所以德契

主知範爲士則者蓋在是矣方吾師之歸自粵東也  
省堦紅藥已崇密學之班祕閣青藜兼掌勅邱之籍  
苟論人望宜早致於雲霄第計年資猶當紆以歲月  
而乃

帝心簡在眷李嶠之文章朝列聳觀歎九齡之風度  
旣權夕拜便領春官凡值從容每

賜顏色放心之奏如溫樹之不言造膝之陳與鼎鹽  
而同味其在禮部則春秋匪懈夙夜惟寅端拜而證  
曲臺高議而裁綿葛其在工部則鈎稽隄防監董將

作上陶下梓衡乎古歸林歸竈審乎材其釐銓法則  
甄綜四選澄敘九流燕輕雀重無爽乎衡虎餓麟飢  
不譁於辨其董錢法則磨鉛必祛緹環無雜法釐九  
府而銅官之利宏藏納三錢而金部之儲實斐忱丕  
著嚮用益專至於辨辨螽斯煌煌桂樹或耀鳳毛於  
曹監或展驥足於秦關或射策而儲沂國之才或通  
籍而步蘇公之躅稚子亦成麟角諸孫悉振龍文此  
則竺生威喜之芝駢茁音聲之樹者也夫以望實如  
彼

眷倚如此而吾師法姬公之翽翽步衛侯之抑抑健

鬻之鼎勉以循牆布被之銘嚴於相室士甘於肉而  
門無笑梯之賓德輶如毛而坐有裘杆之屬且又谷  
神不老氣海常溫渥丹無藉於酖顏元鬢未間於宣  
髮蹲龍之力可信於翹關斟雉之圖更慎於觀井蓋  
天將付以殊常之勲業先鍾以異量之神明宋之文  
富明之劉謝其明徵已岷峨山遠梅雪春同敢歌燕  
喜之詩用比鶴飛之曲七十子之心悅諒無疑宰我  
之阿廿四考之勲名願更券天孫之語

廖陸峯先生七十壽序

歲己巳

天子五旬萬壽福州廖儀卿鈺夫兄弟同雋郊祁並  
舉軾轍齊名我陸峯先生之慶長矣甲戌孟陬先生  
暨德配太宜人七十初度梁鴻夫婦相樂地仙謝鳳  
子孫並揚天士於時三千上客飛百盞之流霞九十  
韶春駐一壺之遲日形諸讚誦蔚矣其文先有庚言  
敬爲辰告蓋昆崙高萬一千里而後夜光之積蕃黃  
河受千七百渠而後日母之歸大先知最詳請舉其  
實孝乎惟孝醇乎其醇者也懿其孔融早慧楊億能  
文窺曼倩三萬言誦尉律九千字耆儒目之爲小友  
黨塾咸謂爲神童其先贈公不言躬行如萬石君可

任將帥爲百夫長龍泉知我猿臂不侯官比騎牛翁  
還失馬沈沈潭影含沙之射偏工急急臺符投杼之  
疑交集銜碑不得語君如彼何哉負劒遠行遊吾從  
此去矣時先生僅九歲耳四顧蕭然一寒至此有採  
棘匕誰濡涸轍之魚有狂茅鴟且嚇覆巢之鳥先生  
走書於劇孟求救於伯仁西華負薪平原乞米六張  
五角勸蠶草以忘憂百結千絲幸綵縷之解脫事旣  
已不知贈公所在行萬里道裏百日糧水水山山木  
有枝而橋竦朝朝暮暮烏何事而雛啼凡若干日遂  
遇贈公於延平旅次白雲在舍青雀投懷牽老人衣

身入玉...  
作孺子泣音容如夢悲喜無端父兮兒饑可記擊珠  
之掌母也天只幾成化石之身畚民間而聚觀劍水  
爲之嗚咽此則幹父之占宜筮先後甲三日尋親之  
記合藏大小酉二山者也古之徐仲車近之黃孝子  
先生蓋無讓焉至若喜誦讀習禮容端然輔然瑟若  
奐若萬間之厦庇世八厨以財振人又且研雜家有  
材藝經通相宅圖可開山種石以鎮百神聚米而知  
兩戒當世所樂推先生之餘事也朱太孺人淵問激  
蘭柔芬儷月舅姑歡其克孝中表則其有齋其諸鍾  
郝繼徽樊劉合德者歟今者儀卿鈺夫繪天上之星

雲以篇家爲霖雨諸子二茂才一孝廉一上舍孫十  
並玉軼金羈瑤環瑜珥高岡之桐葦葦中庭之桂煌  
煌人不以爲先生之榮而以爲先生之德故知壽佛  
發十二願真仙積四千功天道有棹枹動而鼓應人  
心如水江共而河宗詩曰樂只君子保艾爾後斯之  
謂矣先等於儀卿鈺夫托如蘭之契望其善則歸親  
也於先生附維梓之恭慶其孝永錫類也

林暘谷太翁七十壽序

粵惟倉龍舍於疆梧陽鼂貞於味柳則暘谷先生暨  
陳太宜人七秩弧悅之辰也令嗣少穆太史進其友



郭尙先而命之曰夫北山有萊詩人之善頌東海有  
棗曲士之飾言若宜爲言勿逐於飾先誠無學敢讓  
當仁爰奉竚而稱曰松柏有心鬱蒼鬱對雲氣多壽  
廣大精神恭則壽者泰尊之福謙逸則壽者猶龍之  
繕性况乃轅生傳業李嶠多文龐德公夫婦皆仙陳  
仲弓子孫式紹者乎少穆雅識宏才衆流仰鏡夫翫  
懸黎於郢握則景抵鵲於三成矣豔明月於鄭櫝則  
企潛驪於重仞矣約言盛美凡有五端若夫家承九  
牧寶殷篆於銅盤居卜三山實海城之蓬島偉茲人  
傑幼號奇童爲張茂先盡誦二十載以前之籍陋段

柯古相矜卅六體徒豔之文脉望一環卽炤數點太  
乙降於齋室多目待其劬書手不停披目無交睫每  
積珠船之貺幾生銀海之花其力學有如此者夫苟  
翫龍鳳之文登於黼黻騁驥驟之景籥於閭風豈不  
夜珠之句有徵彩華之拜足美也哉乃僅一受知於  
朱笥河先生有嗣響遷史之目又常再處解頭再以  
目肯未終試事猿臂不候鴻毛匪順琴中賀若羞競  
悅於箏瑟天外數峯每爭鮮於金碧秋江之蓉靡怨  
空谷之蘭自芳有仲長統樂志之作無劉孝標辨命  
之文其恬雅有如此者經師人師小扣大扣鑄人以

治度世如鍼直教忘指盡契機緣但得點睛便成鶩  
翫莘莘俎豆有鹿洞之規濟濟組紳共龍門之慕其  
善教有如此者至若裋躬若砥制行如銅萬頃之陂  
千尋之壁仁孝篤誠之履辭受取與之防冰不言而  
寒丹不奪其赤諒在衆孚未煩覲縷其劭行有如此  
者陳太宜人毓自名門嫻於女誠數米以食真勞巧  
婦之炊椎結而前別有隱居之服鴛鴦繡出行三  
十六雙縑素織成一月四十五日善心爲宛德音不  
忘瓶無儲粟而惠浹親鄰味必分甘而愛逮婢獲是  
則鍾郝禮法彼乃居亨樊劉唱隨此焉襲美其刑于

有如此者夫峯之峻峙者址必削故演迤者貴焉華  
之早敷者根必淺故晚節者珍焉通塞之殊途前後  
之相劑也先生體谷神之旨綿氣海之溫花草驗其  
安和林木秀其名節荀卿言其美意史游頌以復丁  
少穆以天上之石鑿爲文中之鴻鳳文途儲九駿韶  
樂待一夔白氏樂天雞林知貴其作歐家信本高麗  
遣購其書煜文昌於翼軫之躔贛水之珊瑚盡網耀  
執法於董賈之宅

帝廷之觴觥將升而次君玉軌金羈令孫瑤環瑜珥  
學成麟角池有鳳毛鵬搏皆九萬里以增黎顏蒜髮

之權桃熟以三千年適効木公金母之瑞詩曰壽考  
維祺又曰保艾爾後斯之謂矣先更有言家君劭學  
植行貞遇履和比諸景行殆猶合節惟先兄弟視少  
穆爲媿甚耳計先庚之歲實週甲之期亦願乞畫日  
之豪寫注年之券也

蔚庭鄭先生六十壽序

曩觀浦陽鄭氏事心嚮往之何則負若瑟若龍蹲喻  
範行之醇孝于友于鴻飛洽施政之訓韋帶有珍禕  
之勵則被璠荆者改容矣萬石有不言之修則擁臯  
比者讓席矣盅酥所鍾龐稊來介宜也稱也祝梨闕

茂之年陽晁次於某月寔維養梧先生六十大慶猶  
子雲麓小天屬其友尙先爲辭以壽夫將紀蹊桃之  
信而或摭海棗之言非先生之所樂聞也非雲麓所  
爲相命也若夫石生而堅玉完於璞家儲萬卷承通  
德之所傳勤寶分陰景士行而命字在瑜珥瑤環之  
歲無泥龍竹馬之嬉熟鑿楹之攸貽非折蓂之待督  
每滌石慶之踰時披老萊之衣惻念於東莖之吟梗  
歛於邢渠之畫推梨讓棗長枕大衾中庭之桂樹必  
連枝堂上之棊衣無常主饘是粥是惕踐履於舊銘  
松耶柏耶極經營於先隴廟則東室西室田則五雙

十雙族仰潤河隣待舉火內行醇備古人何加焉少  
好深湛之思長多瓌麗之作謨觴爲室脉望如規六  
一之文成於三上太冲之賦鍊以十年羅道妙於角  
根如披靈寶避俗工之金碧獨寫遠山雖和氏有其  
愆而生煙之壁隱伯樂不常有而逐電之騁鬱先生  
恬然靡所顧也心如止水志在高山聊託景純之經  
自暢康樂之興振衣濯足魚鳥親人寄壑尋邱煙霞  
供養摩雲鴻鵠想海外之九州題石龍蛇識鄭公之  
三絕良辰美景嘯侶命儔掃安樂窩煮眞乙酒疎簾  
清簾仙奕相依玉躩金題寶章待訪撫絃則衆山皆

響擊鼓則羣花盡開斯則謝俗慮之闐闐極才人之  
儻募者焉夫仲長統樂志之篇傲王侯以園畝稽中  
散養生之論守貞白以延融麩齋仇督比於沖漠鏡  
機卑祿殖暇讓於耒耨球砑彼皆遙擬其迹此乃久  
親其風故知長日如年寧靜之心自妙雲氣多壽湖  
山之助無方且也遺榮則抱瓮帶索染翰則徵仲石  
田道有三叟之詢泉有卅家之汲猶躋大壑以著福  
郵况德劭道優性充情約婁元儒不至於穀柳仲郢  
克閑有家含靈之所宗泰尊之所篤者哉金贏匪富  
珠樹皆芬封胡羯末並秀其玳瑁綜纈繹維盛儲夫



胡輦先生谷神不老氣海常溫重看鐵樹之花徐飲  
銅池之水驗耳鳴之德公果爲地行仙據心寫之詞  
先亦作天際想矣

郭大理遺稿卷五終

郭大理遺稿卷六

文四

目錄

那繹堂先生壽序

代

菘圃大司馬壽序

代

許提君壽序

代

王石臞先生壽序

代

穆鶴舫尚書太翁壽序

代

卞母陳太夫人壽序

李母陳太夫人壽序

許母林太恭人壽序

代

陳健齋先生家傳

書鄧貞女事

祭李硯雲先生文

代

祭徐淞颿都轉文

代

祭余母黃太安人文

祭蒲陽義冢文

郭大理遺稿卷六

文四

那繹堂先生六十壽序

代

山川鍾命世之英必有延洪之算以展之日月照盟  
心之學必有平格之錫以酬之召公之銘方叔之詠  
唐之汾陽宋之潞國媿哉著矣我

國家盛治鏡澄龐禊璣貫駢旌之舊族喬木之世臣  
有房杜焉有韋平焉揚馬以轡龍摛文英衛以虓虎  
著績而以才華見者或無稱於事業以武功耀者又  
不顯於文章求其治內治外能武能文功冠一時行

有九德者其惟我繹堂夫子乎歲癸未十一月爲我夫子六旬攬揆之辰

聖主眷倚老成便蕃錫賚

御書亮勳集祐四字以賜

命公子馳賚稱慶昭回之象煥乎

天文嚮用之疇錫自

皇極於時朝英省美動色相趨製

聖主賢臣之頌則喬松愧山澤之臞揚延年美意之徵則旗翼並台符之燭况某等幸近鑄人之冶可無贊佛之詞哉蓋自先文勤公應金甌之立相調玉燭

以和時先文成公華蓋一星身作擎天之柱河源萬里手開益地之圖積慶著於文言教忠備於家範使公席金張之產業藉王謝之門資武達文通拾芥之喻非遠言揚事舉披榛之采未煩而先生依顧杼之親佩折夔之訓言文章則六一言勲績則八州乃玉乃金鑿楹而受語如龍如象畫荻而研書挫萬物於豪端則造化在手傾羣言之漉液則坯冶一陶斯非第華胃所鮮能抑乃寒賤所莫逮也已而排金門上玉堂豫章拔地視霄漢而不遙大鯤擊水隘滄溟而

獨運簪毫

紫闥廣八伯之星雲視草

樞庭沛四和之霖雨傾心之素觀乎園中之葵造邾  
之謀悉於溫室之樹時則楚氛未靖蜀道猶難捷書  
屢達於甘泉兵氣仍屯於關右公請縛袴褶以掃櫬  
槍燦壁上之旌旗羅胸中之戈甲雷雨赴其律令草  
木佐其威神厥有龍山之捷岷州之捷其勦廣東永  
安博羅會匪也選十倍之鋒勵三曾之衆日弓月矢  
誓族制其拚飛蟲臂鼠肝蚩尤碎其肩髀其除廣東  
海盜也偵潢港譏關津俾掠無所售俾飢無所哺雖  
使船如馬難敵飛來迨賣劔得牛始羞降晚而平剗

滑縣一事尤赫赫在人耳目者方夫星流地鴉社隲  
野狐妖逾呪米之巫毒甚銜沙之蜮公馳驅受

命慷慨誓師九地九天十盪十決捕必滿品逐如追  
逃驅而納之窮鼯鼠於嬰城聚而殲旃沸鯨鯢之游  
釜舞梯衝於天半突將無前鳴鼓角於地中垠崖忽  
豁蠓蝻戢戢盡歸赤舌之燒鴻雁嗷嗷齊拜白豪之  
相朝馳露布夕拜

天書獎臣功而重穀璧之頒溯祖武而賜椒馨之奠  
聖主之知人良臣之報

國洵千載一時哉至若敷仁秦隴則春度玉門底績



河淮則秋澄銀漲歌思在五嶺之外禱祝溢三輔之  
中又若文昌弟子之宮三膺選佛東壁圖書之府再  
長列仙致人則殷翼之孫相士則孫陽之友凡一端  
之舉似皆萬衆所翹瞻諒在衆聞未煩覲縷已蓋道  
則岳鎮淵涵故履非常而不震心則珠澄水止故隨  
所遇而可安蓋誠足以契

主知故雖蹶而復振忠信足以質寰夏故不介而皆  
孚比者河磧之間旃裘之衆未定犬羊之錯幾成蝸  
角之爭公甫卓蠡旗爭抱馬足穹廬立徙區脫頓空  
此非中孚感物先聲奪人其能談笑之間指麾已竟

乎

皇上念戴日之忠覽凌煙之畫

特命文成公從祀

太廟飛酈之勳藏  
在盟府緣鵠之相祭於大烝則亦  
以孫謀之貽褒祖德之述也謹鞠脛奉觴遙爲我公  
祝曰八百三十齡演斟雉之年於未艾一萬八千歲  
佐成鳩之化於方來蓋幾窮於曼倩之詞聊以比諸  
皇華之笑云爾

崧圃大司馬七十壽序

代

壽佛三十二相瞻者莫能名長河千七百渠觀者難

郭大理遺稿

卷六

文四

四

爲水其諸我宮保夫子乎歲乙亥睢州河堤成公以  
勞加太子少保入爲大司馬越丙子攝提貞於孟陬  
則公七十懸弧之辰也

天子眷禮老成便蕃錫賚羣公動色左右相趨揚延  
年美意之徵則旗翼信矣摛

才際  
聖主賢臣之頌則松喬小矣蓋自先少宰以遵優之

義軒之聖衆明高翼遠軌臯夔參身洪流近驂齊靳  
瓠堤棗野栽多南國之棠洛苻河苞經授北山之梓  
公承名父之積慶有神童之美聞步金門上玉堂鬻

龍文箋鵠序

帝善其言如東方先生遷其巒爲北門學士一錄秦  
士更使皖江新命遂膺舊勳是續其陳臬如臯陶其  
旬宣如郇伯釐天倉之紅粟掌邦憲於白雲爲光祿  
勳轉直學士山公之啟其公也水部之稽其勤也禕  
矣盛矣潮河堤吏也從公在治河仰公在行水今夫  
泗汶西注諏白老以分流秔稻東來醅黃王而轉柁  
八牖以節之四湖以儲之引乎衛而濁者澄之循乎  
濟而餘者洩之法至密也今夫壺口門輪高浪被毛  
城之堰胎簪井濬清波勒惠濟之祠湖之餘水軌黃

曠以趨江河之經流望雲梯以走海法至密也步驟  
殊途古今異勢有陳漢氏之海運則舛矣有尋神禹  
之故瀆則昧矣又况秋風乍起星奔飛鳥之源春水  
方生雷集登龍之峽一曲一直左堤右堤驚沙坐飛  
遠岸無影波濤合沓真聞海上之琴婦孺喧虺幾駭  
歷陽之曰公身為砥柱掌是華山九圍竹落鐵石同  
心三月桃花馮蠅受約鈎稽數百萬帑若網在綱指  
麾百千億人如身使臂濤聲入枕五夜呼燈岸曲流  
冰一鞍冒雪頭髮爲白帶孔忽移夫爲督撫者統攝  
以千里計耳爲大將者蕝事以數月策耳豈若爭氣

數於不可知馳意念於不思議心監白水福及蒼生  
者乎今者五老圖授千年水清璧社浮珠於闐採玉  
淮徐之鴈戶兗豫之榜人飲水知源涉波思德如川  
方至指九渠爲報束之祈謂山蓋高信二室爲生申  
之嶽而公方斟元氣踐台符飲太極之泉

賜延年之杖其德益宏其福益遠見黃河之大湖幸  
依六一居士之門敷赤縣之和公其種八千春秋之  
樹

許提君七十壽序

代

天壽平格清陽資八柱之擎世篤忠貞上將耀三曾

之武銘之彝鼎有伯相之綰綽焉敵之詩頌有元老  
之壯猷焉

國家燭照和時圖徵益地搏桑柳穀隸疆索於舌人  
西鰈東鷄戢風雲於樂署蓋必有熊羆之佐柱石之  
才彰赫赫之光肅趙趙之義於以抗稜于四極四和  
佑化于九窾九勳彼夫伏波之矍鑠營平之持重蓋  
蔑以云也我節帥成都公其今之郭汾陽歟公生有  
奇表幼卽遠期兼甘蠅飛衛之能靈烏畏其鳴鏑撫  
湛盧縵理之利神猿避其淬鋒握奇聞誦案石而圖  
成羸越溯聞嘯雲而氣上遂擢武科備環列時先昭

毅公以圖麟之舊將戰跼鳶之丸封奮九天九地之  
籌據七縱七擒之略身歸箕尾氣作山河朝有鐵券  
之褒廟於銅柱之域公讀名父之書佩子侯之印以  
忠勤爲繼志以果毅爲克家若李梁公必踐西平之  
績若陸幼節用光伯定之勳耿耿結忱隆隆嚮用爾  
乃分郎將之重莅翼軫之躔於時地雁西流社狐夜  
嘯旣含沙而煽毒羌呪米而興妖甄綜韜鈴馳驅鞍  
馬胸有積甲身作長城劍無十步之留師有萬倍之  
用厥有王母垆鳳凰□□腦灣之捷中保塞四方臺  
大堯口之捷而嘉陵一役勳績尤偉自天而下如山



之苞振臂一呼齊心萬衆草木山上盡助旌旗雷雨  
江頭如赴律令畢方立礫視空皆空一塵不驚萬戶  
相賀泊乎閩中授鉞海上揚船以忠信涉波濤以子  
弟拊卒旅旣擒楊太真是飛來誓馘盧循豈容仙去  
日弓月矢方之誓族之司井鉞參旗靖夫櫬槍之氣  
厥有下加冬茅港之捷鹽水港街之捷竹圍太史宮  
之捷笨港鹿港之捷其他勦寇廣安捕盜高廉慎於  
幾先迅於臨事以故

九重嘉賴

三接便蕃繼勇嘉名比於精忠之獎孔翠耀首榮於

貂蟬之華此皆捷書達於甘泉功狀上之史館瀛壖  
仰卿雲之燦外裔識岱華之尊非夫列校感挾纊之  
温庶士食投醪之惠所能增飾盛美讚導華詞者也  
夫功之顯者劍之宣其利也功之茂者磐之安於鎮  
也公神禫其神宏碩爲度一弓二矢日閱樞質之長  
十抽一推時獎闕虓之士翹關超距人無匿能雅歌  
投壺已有餘暇斥候謹故螭未翅而撲之鈎稽密故  
類有爪而柳之方今海不鴻波野有露積巷無竊視  
傾聽之事民皆含哺鼓腹而遊則公之酬

主知承先烈者不其偉哉不其彰哉至於內行醇備

如高密侯至孝性成如石內史刑于之化如梁鴻詒  
厥之模如謝鳳學道謙讓之悃詩書禮樂之徽固寰  
中咸信於置郵非磨下能罄於覲縷矣今年某月爲  
公七十大慶周公師保僕射父兄旣合鳧藻之私宜  
有臺萊之頌夫魯車揚烈猶傳難老之章東哲宣風  
當致長生之禱况夫豐功駿烈景鑠瓊禕如我公者  
乎謹鞠臆稱觴扶服上壽曰三千六百軸今觀齊尚  
父之飛躡八百三十齡請繪商大夫之斟雉

王石臞先生八十壽敘

代

在昔斟雉之大夫述古於觀井之歲猶龍之太史傳

禮於踞竈之時西河之賢對端冕而扞論濟上之老  
進智囊而授文蓋經籍繫乎人彝昭晰賴乎天口天  
將以佐亭育開狂獠雨粟賚之生著助之成則彰虹  
玉之瑞藏則蘊絲竹之聲俾絲絲延延明明斤斤則  
必生魁閎之彥子綰綽之齡而後其業精其傳永焉  
夫導流宗海功在一時撥雲見天教在萬世孰重而  
孰輕孰難而孰易乎歲在昭陽律中姑洗實我太夫  
子石矐先生八十攬揆之辰稱媿而前行黎收而上  
壽者僉曰飛鸞之紀生應壽星翼燕之謀光懸卿月  
勤學苻於麟士矐鑠過於馬公庸知先生學海之富

非直一卷之師名山之藏自定千秋之業也哉蓋先  
大宗伯公韶樂一夔戴匡六宿門承通德慶積文言  
璇柏之淵明月輝於照乘樊桐之圃虹氣起而燭天  
先生稟項橐之資勵廣川之學燈常燁掌瓜可鎮心  
丹編春校則太乙下觀綠字宵披則多目闇侍時東  
原戴氏心昭天咫尺世仰經神先生依吏部之抗顏爲  
馬融之高足銳銀旭歷心契於九宮勾股較和用周  
於八線然而雲興日觀願降潤於九州鵬起天池思  
搏風於六月詎第欲以著述慰情以文章報國哉於  
時西清始踐時推五鳳之文水部繼登職慎五鳩之

庀及官大諫首擊態臣舍狐狸而問豺狼如鷹鷂之  
逐鳥雀雖避人焚草末由編諫苑之書而嚮日傾花  
固已謝諍臣之論

帝方信重

命以宣防凡爲運河道者一爲永定河道者再公疏  
川導滯灑沈澹災手執纛垂身爲砥柱莅馮蠆以使  
節覈金貝以算經謂春水方生秋風乍起兩岸難於  
辨馬萬戶駭於狎鷗於是創梅花樁以測水勢謂一  
曲一直或委或原惟流增衣帶之通乃風助帆檣之  
利於是開牛頭河以廣水源嘗撰導河議上下篇又

撰直隸水利事宜窮行水之方則靈祇來助問分流之法則野老皆師普沾溉於溝渠則一心穿地爭險夷於氣數則隻手回天心罔弗辰冀筮坎不盈之象月離于畢忽哦雨無極之章天實爲之身將隱矣爾乃卻掃杜門著書遣日自性命之說勝而援據之學疎自倉雅之義湮而許鄭之說昧望文生義幾改蘭臺之漆書遇物知名且愧學童之尉律偏旁意造豈北斗可使作書草木辨疏恐列宿亦將騰笑乃取張揖廣雅爲之疏證研尋六籍覩縷四聲旁徵金石假借之文次及騷賦援引之詁金鎔於冶珠聚爲船此

則國門之懸呂覽莫敢指一字之疵匪直祖庭之聽  
威音私自爲六時之誦也是惟貶儉陋以饋貧之糧  
予芻蒙以益智之糗豈與夫虞卿窮愁而撰書揚雄  
寂寞而命筆者歟我夫子獻江都之三策兆稚圭之  
五雲以霖雨之篇家賡薰風於

帝陛已佐便章之化益勵中蹇之忱蓋觀梓而仰紹  
弓植槐而知貽矩已我夫子所著經義述聞及釋詞  
二書間禮間詩山淵資其富釋詁釋訓鈐鍵會其歸  
夫小同承業僅傳鄭志之編浚長詁文第綴許沖之  
奏以古方今彼或恧焉蓋扶輿清淑之氣鬱積而舒



華

國家洪鬯之庥醞釀而毓哲是以樸學之盛鍾於喬木之家經術之昌喻於若華之曜今

天子臨雍講學玉振金聲虵珠之握士勵九能龍燭之光人師一老見岱華而岡阜皆思崇壤游溟渤而涔滴亦勉朝宗然則先生爲後世廣網羅卽爲當代揚黼黻也某等級此小言示於志學俾知七十子之服孔子原無阿好之談且知八千歲以爲春秋實有自操之券也云爾

穆鶴舫尙書太翁八十壽序

代

焉逢浥灘之歲日月會于壽星有

詔賜我太夫子某某公二品章服觀橋觀梓拜後拜  
前陽輝燭葵霍之心天貺引眉梨之算朝英省美動  
色相趨仰溫公於獨樂之園謁白傅於履道之宅謂  
好德而錫之福寔符

皇極之疇謂能仕而教之忠固積文言之慶越十一  
月十三日則公八十攬揆之辰也一年春好手種之  
橘初黃幾世修成索笑之梅轉羨夫撰

聖主賢臣之頌者榮名邁於偃佺揚延年美意之符  
者綰綽徵於保奭真率會則聞歌詠耆英社亦著畫

圖况某等幸到祖庭親瞻壽相可無惶引以佐觥籌  
哉謹再拜稱曰木神則仁毓自皇風之躋雲氣多壽  
敷爲子雨之甘人知公貽矩之宏而未知其度繩之  
謹也人知公載福之篤而未知其養智之恬也夫其  
席駢旒之華族稟蠟鳳之雋才靈寶神書綜倉頡佉  
盧之製華嚴音紐訂孫炎沈約之譌異義則叔重無  
雙真書則僧虔第一蜚聲薇省勵節柏臺旋持廷尉  
之平卽正端明之秩鑰司

丹禁金吾極仕宦之榮隊肅青旗僕射有父兄之號  
方其爲御史時監試內簾也心如水映笑比河清以

執法星爲中流柱卷分束筍人勗披榛譬諸象罔當  
觀閭以求珠豈有干將肯自言於躍冶關節不到翹  
秀畢升其巡視瓜儀漕務也知轉輸之困由偏授之  
侵漁知腴削之多半臺胥之乾沒風霆肅其律令日  
月灼於容光誠不介以孚事不勞而集千檣風滿馮  
蠓畏鐵柱之冠一片心清親友識冰壺之貯此其播  
在遠邇衆所聞知者也至若陳白簡伏青蒲造膝之  
詞比於晶鹽之昧沃心之語閱於溫樹之言已當是  
時卿月霄懸岳雲人望意衆明之高翼思揚歷以優  
賢而乃烏未倦而亦還驥方馳而中蹶命莫之致值

箕斗於身宮拙亦宜然付角張於世事時有惜公去者將以新疆辦事大臣薦公力抒素忱堅辭新刻謂志存攬轡敢忘萬里之馳驅而髮不勝簪祇稱一屨之偃仰蓋閒居之賦遂樂志之篇成矣每論莊子一書其所喻也微辯超於非馬其宗極也遠旨契於猶龍王何第獵其華向郭未暢厥旨爾乃握鈐鍵抉藩籬如陸元朗之撰釋文如嚴君平之作通論若披雲而見日若探驪而得珠斯則繕性資之攝生以之具茨之訪非虛大椿之齡亦實者也吾師鶴舫先生爲翰林時貽以金籀勗以玉等詩禮固治官之本臯夔

有盡讀之書泊於文獎

丹毫位聯蒼珮

天子識尙書之履文昌坐弟子之宮側聞定省之時  
猶舉粥餽之訓景仁觀帳可想希文之壘務觀作銘  
逾重君實之被斯則唯謙受益足爲彌性之徵以善  
歸親更睹引年之盛者哉夫溯九曲之河源水唯金  
色望三成之崑圃山祇玉光何則覽遠者難爲形舉  
大者拙於似也某等寔慙少文差無妄語著書好古  
今逢斟雉之大夫翊

運貽謀請繪揚鷹之尙父

郭大理遺稿

卷六

文四

十四

卞母陳太夫人七十壽序

丙戌九月卞光河太史過其友郭尙先命爲文以侑  
太夫人七十壽筭先素蹇於文顧光河遇先厚弗敢  
以陋自匿光河文藻蔚跂當時鮮倫其必歎之也因  
書於屏風曰璇柏之淵徑寸之玼萃焉樊桐之圃連  
城之璞羅焉友風子雨之蒸必興乎日觀沐日浴月  
之滙必導於星源今者光河以霖雨之篇家庶叢雲  
之浩唱司馬大人之賦海內爭傳微之才子之名  
禁中所定板輿方遄

芝誥已膺興慶朝趨瀛洲春好金魚之子粲粲於契

羞銀鹿之孫雍雍於佐餞太夫人之榮備矣而抑知  
霜辛露酸丁年集蓼旁風下雨頻歲補蘿哉懿其家  
承文範訓受女師蕃釐觀裏花四照而邀仙甓社湖  
中珠一丸而弄月其歸我先德新盤公也人稱孝焉  
夫先德當御輪之歲已謝純采之衣太夫人目不覩  
君舅之容耳不聞先姑之訓梁稷之燠未奉榛栗之  
贄莫陳顧乃令德來教孝思不匱撫栝捲而增梗塞  
展畫像而積驢思春露秋霜特性饋食洞洞屬屬僮  
僮祁祁神之格思不可度思物其多矣惟其嘉矣此  
則思結於食藜慕深於刻木者也爾乃鳴雞戒旦挽



鹿持門諸于繡驅無羨於袂良阿錫輕容有過於機  
絕春月和悅以勗乎東坡清風穆如時晞乎吉甫和  
氣花竹眷屬神仙俄而子晉將賓維摩示病三醫技  
盡七壯方訛坦坦天高莫窺神道許之字闐闐墻壞  
忍聞臯某復之號竹止孤生烏難共命顛頽三星之  
留淒迷九寡之絲太夫人睠此鳳毛冀爲麟角導之  
以畫荻威之以折筮授之以鑿楹之書視之以熏煤  
之帳爲賓劉薦仍祛衡纊之交道婢賣珠徧購琳瑯  
之簡每霜聲在樹月色當檐英舍三間熒燈一盞母  
機軋軋兒誦琅琅鄰雞忽鳴階蛩如訴覽中壘之傳

而竹柏之懷堅授宣文之經而蓬麻之喻切兒適于  
里則爲縫東野之衣兒獲一官則爲誦西征之賦蓋  
光河自勝衣之歲及珥筆之年太夫人視之常若綳  
兒督之常如嚴傅光河偶與交舊言及徽音未嘗不  
蕭然佩勞逸之箴奮然矢孟敦之念也先惟旣醉之  
言福也莫大於士女之躉保傅之言教也必慎於嬰  
孩之始其時久則漸漬也深其地親則糾繩也密萬  
灌之劔剖型而淬之九合之弓受繫而約之故雖以  
孔孟之姿必加以顏仇之訓下此稔侯之忠謹長沙  
之績勳通師清臣之書永叔子瞻之學皆扶牀而受

提命鳴杼以勵精專草固拔心而蘭芷之風郁花常  
樹背而槐棘之蔭安光河益勉遵優爲時鼎輔則所  
以揚茲徽樂頤壽者茂乎鑠矣抑又聞之宋張師亮  
母孫太夫人封疏晉國年近耄祺每預朝賀之首行  
必被寵褒之手詔時人美之史冊榮之今

天子孝治日隆

恩施雲布

東朝之奉有曜於崇徽西母之琛將廣以壽世行且  
好德之疇錫自

皇極行義之號獎以

王言豈與夫龔媼之稱永蘄晉姜之銘屯魯也哉

李母陳太夫人七十壽序

自昔臺萊之祝易爲藻繪之詞至揚美於柔徽尤難  
繩以實紀何則璇閨之祕莫覈以覩聞銀管之書匪  
詢諸戚儔金車玉馬排比見長火棗交梨俯取卽是  
陳勞逸之論則人盡敬姜賞訂謨之詩則才皆道韞  
豈知漢言哀孟晉美郝鍾封鮒以勵八州和熊以勗  
六一固有信而可徵近而可觀者乎癸未十月蘭屏  
太史蘭卿侍讀索先爲文以介太夫人壽蓋蘭卿以  
霖雨之篇家結望雲之遙跂將借明馳之逸足方修

稱兒之上儀也先與蘭卿兄弟苔岑合契交兩世之  
紀羣芸館聯行附一舟之季郭雖文不足以逮意而  
誼罔讓於當仁方太夫人之歸於硯雲先生也先生  
已馳辨駘之聲振轡龍之藻矣然而撰碑持正終解  
計字之縑按籍更生莫驗點金之術寒如范叔將製  
芟以爲衣飢甚東方豈煮沙而可飯太夫人甫承授  
阼卽瘁持門以巧婦之炊計饑年之穀君舅戚姑欣  
其惟孝兄姒弟叔仰其有齋婢獲戴其慈姻族孚其  
惠譜之篇什卽是女師書其話言皆爲閨範及先生  
戴惠文冠號忠惠父吳淞之水偕愷澤以俱流峴首

之碑奉神君而特祀頗聞甘棠之化亦藉葛覃之詩  
官燭輝輝仍照徐吾之壁寒機軋軋時聞宓子之琴  
蘭屏兄弟能言而授之學能仕而教之忠少時了了  
固秉甘棗之姿誨爾諄諄實賴宣文之訓凡此孝恭  
之德慈儉之徽諒在衆聞未煩覩縷者也家居時有  
望衡之舍值卒歲之辰避債無臺家徒立壁賣僮有  
約兒始扶牀非春非秋桓山之禽惻惻別子別母胡  
笳之拍茫茫太夫人急計鉅筭兼搜盡篋不愁金盡  
但使珠還見青雀之投懷喜飛蚨之歸母其在江左  
時有某刺史者華表之鶴不歸高樓之燕猶在寓公

則流離之子義故則陌路之人太夫人憫其惻孤頻  
加存撫分一囊之仁粟已飽飢雛導涓滴之廉泉卽  
蘇涸鮒仁心爲質德色早鋤斯二事者如元冥之轉  
熙陽如妙音之赴感應非待來求之鉢非期必報之  
環蓋積之以誠故觸之立應養之也素故施焉必周  
粗疏二端他可概已先嘗觀於山焉福地所鍾仙都  
是託玲瓏樓閣縹緲雲霞人物喬松草木芝桂然其  
始也必有捫參歷井之峯必有九息三休之磴先嘗  
觀於水焉具區之廣必三萬八千頃以瀦之翁河之  
長必一千七百渠以助之由前之說可喻遇之詔信

由後之說可喻福之戢香今蘭屏步西清以暉卿雲  
儲東岱之興時雨蘭卿密勿

中禁贊房謀杜斷之猷典校西江極貢玉論珠之盛  
然則覩明玼之照闕益溯璇柏之淵欽美璞之貫虹  
彌仰樊桐之圃縮綽之蘄斯信純嘏之祿自甄豈待  
阿環錫真嶽之圖金母問洪桃之核乎一縑可賭真  
無剪綵之詞百竚遙飛或得投壺之笑爾

許母林太恭人七十壽序

代

焉逢旅歲幹之良日月會壽星之次

天子以紹元四載校藝三清於時我萊山同年入試



延英載膺高等七寶久依於講坐十聯又寫於屏風  
頌之者謂官近鼇屏行擢槐廳之秩羨之者謂

恩分鵬錦正裁萊綵之衣蓋踰月而爲年伯母林太  
夫人慶七秩矣集賢之杯十九爭介賓筵女姝之歲  
五千各蘄仙算况章與萊山兩寫重花之記同勝論  
交一過刺桐之城登堂拜母能言乎徽華之所以備  
戩祓之所以成詐假攀詞實徵桃頰蓋惟太夫人秉  
淳始影毓懿長林教嫻戊姆之箴驚誌庚姬之孝清  
芬所紹方州十德之堂端操有蹤靜女三章之管婦  
範已師於鍾禮父書尤熟於周官迨

贈公琴瑟之求協詞女芝芙之夢牛衣尙困鴻案初  
齊太夫人當結帨之餘爲鳴環之相千詩百賦訓答  
蟬嫣一袂雙心有無羶沒餽調燼蠹撫絃而紀姑恩  
齋潔蕡藜麩食而勤婦爨雪醜椒銘之暇鴻朗排籤  
疏裳竹筥之間鹿車抱甕德象無忘夫誦古樂羊果  
曷以成名福不唐捐婦如影響而况計車歲歲親緘  
徐淑之書江水朝朝虔進龐姑之贈言無出梱力可  
持門善隣之舍三遷同室之煙一氣惻憐臧穀自勞  
補屋之蘿苒治新蔬相召屑親之酒匹絹必勤於敦  
本六姻並賴以賙貧至於植長之行尤重兄嫜之敬

同功蠶繭和謙極以平生均愛鵬鳩立後先於所字  
及至授王融之書學發晏子之楹藏笄珈虛偕老之  
詩護草有忘憂之日太夫人發其煤帳重在經籀門  
屏以寫家箴井日以談舊事猶謂法敬姜之訓必述  
先姑成陸遜之名無忘從祖其宅衷之厚其積慶之  
多乎夫往小來奕者晷影之符前沈後揚者鼓棹之  
運固宜見西豪之才子紹南閣之經師二龍出於平  
輿一鳳鳴而賀世今萊山同年珥彤書笏奉魁承杓  
華蓋爲帝坐之星紫城領神之職屢校瑣闥之士  
桃李成陰近吟

殿閣之薰麝龍接武而尤盛者曩曹母東征之賦在  
陸生南使之方衡岳雲開朱節迎而侍膳湘江春早  
白華潔而吹笙官告院高

賜金羅之七紙宣文堂啟集絳幔之諸生太夫人又  
能勵坭鮓之廉郤華駟之遐繪藻方潔申硃砑以箴  
之藝蘭有蓀喻烝髦以勉之服明綸翟猶縫舊澣之  
裳鼎養湖山尙憶故鄉之水當蘅杜之衣香擷盡而  
荔枝之酒熟歸來太夫人之慶長太夫人之志樂矣  
今者江海秋深卿霄雲麗衍古稀之筴開晚節之花  
登壽車而尊福衢娛吉館而銘飼鼎湖南新橋尙承

黃帕之頒海上方蓬正舉紅茵之宴金魚日下退朝  
而祝梨眉賓雁霜前寄遠而傳笋味太夫人駐壽花  
之景絲保艾之休觴進帑鞞里誇冠蓋蘘荷董薺之  
膳近樂家園尊壺鈴鐸之銘吉宜孫子行且返安輿  
而送喜朝興慶之首行四星之須女齊輝五色之告  
身疊晉崔邠側帽導觀部樂之班張黼遷官屢祝京  
師之第則全家道氣方長臨於紫帽諸峯八座起居  
卽永壽於瓊綱百卷

陳健齋先生家傳

君諱文斛字爲鼎健齋號也先世自固始徙莆田居

東陽村祖父諱字行義具前相國費文恪公所作墓  
志夫其席仲弓之積慶挺伯玉之清才莫邪剖礪已  
激秋水豫章拔地欲上高雲爰自勝衣之年遽羅街  
索之戚無父何怙我生不辰哭無常聲毀幾滅性至  
性之篤比之高曾兄弟三人圖書萬軸四分之粥甘  
必分嘗兩頭之居奇每共賞君心潛十翼日窮一爻  
訂齊母之譌文細師春之占驗鄭君逸訓比伯厚炳  
燭之勤仲氏覃思資西河炙輶之辯其爲文也超超  
元箸鏗鏗說經乾端坤倪神出鬼入身宮箕斗世事  
角張殷翼之孫欲致之元天之上補闕之薦莫券於

敬輿之前君曰遇合命也吾以博士弟子員老矣兄  
弟無故卿相何加勝具勝情期山期水煌煌桂樹韡  
韡移華方冀三珠之柯便爲三叟之詠天乎何酷生  
也有涯瞻望兄兮于嗟徂矣琴在靈牀壁猶遺挂淚  
將洗面魂欲離身敬和慘酷之書子建同生之痛獨  
活之草何用生爲子規之啼不如歸去金丹莫嚙玉  
棺又催追於嬰茀白蜺遇之梵隆紂絕此則山川城  
郭偕翔丁令之魂夙世來生或證卯君之願者矣嗟  
乎兄弟天性也友恭庸行也張仲之燕吉甫以况榮  
伯封之吟東摶以冠什二難曜其穎三義駢其柯顧

未有痛鉅創深神傷身隕者也自尺布斗粟塞耳不聽讓棗推梨因心罕覩或靳耨耨之德遑論墳齏之吹謂他人昆罔感萃原之鹿彼君子女乃葦花底之鷺以此高蹤示于澆俗意亦引上池水以蘇沉痾吹大法螺以醒羣迷者乎令子雲章承貽厥之謀施友于之政名父之子蘭成長於文章衆人之母子美誨其子弟先與雲章少同磨硯長共彈冠唐代據言同年有譜苞氏故訓同門爲朋敢讓當仁輒臚盛節其他嘉言懿行墓志備之不復書

書鄧貞女事



壬午十月余過建州時王愛圃先生官其地爲言鄧  
貞女事可以軒眉可以酸鼻嗚呼黃鵠晨舉詎怯霜  
多獨活秋榮詎知風厲身與竹化石室爲寫其堅事  
有天知魯國以彰其節故曰志立則鬼神避誠至則  
金石開夸蛾所以移山精衛所以填海也貞女爲諸  
生鄧翼女梅寒而秀蘭生有芬受靈芸之針嫺德象  
之什字儒士卓道行女蘿未附脈望已仙樹方春而  
辭花眉對山而罷翠鳥非共命桐僅半生入夢兩鬢  
憑棺一慟以初來婦爲未亡人纈九寡之絲視三星  
之留天非倚杵問呵壁而不聞山可摩笄代循陔而

未果此里姥歎爲遠越隣婦懺其勃谿者矣然而誨  
諸耆儒時聞異論謂女未見廟葬不耐於先塋壻未  
御輪誼難言夫同穴是以汗青不紀綽楔無褒嗚呼  
負石之夫激而蹈海補鍋之匠憤而沉淵當時不以  
爲非後世猶憐其瘁何獨於茹蓼飲冰之人霜辛露  
酸之遇而斷斷不恕屑屑有詞乎夫語學臻奧遇事  
摸稜平日則噓枯吹生後悔則噴瓜炙艾坐使恒德  
愧於制行立謹讓於懷清豈所謂兩間奇傑之氣不  
鍾於男子而鍾於婦人者哉然則貞女抗志不回視  
道若咫非第爲巾幗之金科亦足勵組紳之銅行也

身力... 卷一  
余行雖急不可以無言輒書紀之

祭李硯雲先生文 代

東流不返青蓮嘆駐景之難西面盡哀戴聖勒奔喪  
之記露晞薤上壽有盡而名無窮風滿樹間子欲養  
而親不待嗚呼悲矣維我硯雲先生以賈董之文而  
遲於遇以稷契之志而限於官乃猶展驥之績不扞  
而樹雉之算莫驗耶夫其慶衍削瓜姓傳指樹唐代  
成公莅餘善之舊疆繼常相而興學烈光攸積爰暨  
於公公雙筆兆才三篋徵識咀含雅故甄綜奇觚自  
童州時朱笥河石君兩先生皆深獎焉公益曷遠謨

敦飭素履顏同明月氣若高雲方是時元等仰樸學  
之淵稔芳猷之祕謂希文畫粥便紫憂樂之心長源  
賦棋早運方圓之略魚縱大壑鳳鳴高岡公其儁乎  
已而紫府徵歌鶴原同聽丹臺選俊鳧舄遂飛福星  
照於三吳耶官宰於百里其時江淮之間徐揚之野  
瓠堤初撻桑土未蠶鷗竟狎人畫真產竈公循邑落  
拊此僑蹈黿鼉之危梁哺鴻鴈於中澤民如望歲夜  
可告天旋權高淳縣事治祇鳴琴堂惟懸鏡鳥多閒  
暇訟庭鮮敲朴之聲桑無附枝秀野望春旗之莅當  
道多公之廉與才也因而原官權永盈庫大使重差

夕桀則九數備該傅別鈞稽則五官並用既又權新  
陽縣事放準循繩耨苗櫛髮以光明燭普照萬家以  
菩提心慈悲六道戴盆之獄立雪破柱之武勿庸科  
雉不驚飲羊日遁以故瓜期夢替篇祝滿衢黃口牽  
衣蒼顏臥轍悵借寇之無自期報東以爲酬及其權  
川沙司馬也風移箏去雨逐車來吏信神君民知慈  
母何悟石銘德政竟爲墜淚之碑花滿海城先折磬  
風之木哉昔蘭陵曰美意延年百里曰行道有福青  
牛西去以沖和養谷神白馬東來以慈祥著壽相公  
心如白水志在蒼生所全活者何啻千萬人所挽回

者不止一二數而又匆匆如畏粥粥其謙水流不盈  
山鎮以靜抑且德光晬益道視純酥同貧士之飲啖  
勝少年之腰腳方當噉王公之晚桶賞魏國之黃華  
張公方多祉永享之蘄曹景完高升鼎足之頌而乃  
已飢已渴勤積而五倉空上醫中醫術疎而八成舛  
豈所聞於古者非耶抑佛說十二願終示雙樹之歸  
仙立四千功便返樵陽之籍耶然長君蘭屏才美石  
麟選宜金馬次君蘭卿總角夙兮比蘭成之射策璠  
璣奐若高長慶之制詞象緯三垣珥筆而儲房杜長  
江九派主文而辨淄澠將所謂不於身於其子孫者

乎元等交並紀羣心欽卓魯杲杲出日猶非將昃之  
嗟落落晨星胡遽乘風而去素車白馬莫助斥苦之  
謳絮酒生芻虛聽噫歆之苦心摧悼矣靈昭鑒焉尙  
饗

祭徐淞颿都轉文

代

淞颿名逢豫父官山東濰司淞颿由武部  
郎觀察大名擢長蘆都轉以肝疾卒於官

嗚呼淞颿降曜於昴而歸神於箕乃大星之飛隕歟  
光散而聲隨公之蒞赤畿也岱雲膚寸嘉禾滲滋以  
故撤瑟之日皓老黃兒靡弗忡惶怛疑而漬淚於羊  
公之碑亮大化兮道盡聖賢同之公歿而令而又奚

悲而余之徘徊歔歔不自知其涕洟者則以潘楊之  
睦之一逝而莫追維公先德爲高爲夔爲一錢之劉  
寵爲匹絹之胡威公襲其慶醴粹珍禕千丈之松萬  
頃之陂若白麟在囿一角鬢鬢又若背文仁膺文義  
之長離將提扶賀世以借于帝陛之扶來與扶持乃  
紆虵綬趨龍墀植四松於武部駢九駿於文達五考  
三較我職我顯

帝曰大名吾股肱郡汝其以節往治公宵燭斷帶春  
輶褰帷吏行冰上莫之忍欺爰有牢盆以殷度支  
帝謂公能如第五琦公亦所夜圖維以斷答



聖主之知厥有美疾結轡中池顛顛唵呶而釣考忘  
疲七壯曷醫龍煙舍明去其舍而疾不可爲嗚呼噫  
嘻伊公之德

天子是毗謂且躡台司銘鼎彝朝英省美亦罔不以  
耆壽爲公祈胡庚申之夜不守而辰巳之夢遽罹余  
瞻仰道範以渴以饑公不余棄而鳧蘿我綬昔歲旃  
蒙慙親芳儀絢德砥義以相切劘迄今寤寐猶依滌  
於端然輔然紫然洞然之鬚眉哲人其萎而我疇師  
午割則醜粘臺匪醕靈兮來而月之佩兮雲之旗前  
驅猛狂兮從雨螭聽噫歆之告兮哀余之臨風而漣

泗

祭余母黃太安人文

嗚呼北山從事徒聞將母之吟西面盡哀忍讀奔喪  
之傳浣緇塵於京洛慈母之線迹依然返素節於蓬  
萊嫦娥之靈藥莫問斯則里將罷社隣且停春况備  
子姪之行仰閨闕之德者乎日躔屠維月貞厲相我  
伯母黃太安人之訃至自閩二首六身問華年兮未  
暮八成七壯聞病耗兮猶疑信薤露之易晞可彤箴  
之無述若夫金玉女鍾靈於冶縣三山珠海璇源  
導派於叔度萬頃尊人文學公學是經神靈爲奎宿

聳牙詰曲之誥伏勝託以傳書德象窈窕之篇叔皮以之訓女乘龍旣卜挽鹿而來華鋌匪紛瑤琴自穆讀書而知大義宜稱不櫛先生說法而現女身果是妙鬢菩薩時太母某太安人黎眉益壽蔗尾餘甘苴榆飴蜜潔栝捲而進之紛悅箴續問疾苦而撫之石慶之孝克相夫子敬姜之論必述吾姑仁之篤也芬之茂也今者三孔聯鑣大蘇翔步曲江餅燄香吹紅杏之詩黃閣絲綸星傍紫微之座方謂營香閣奉板輿綴花冠於興慶之朝滌中厠於內史之舍某等許同親串將拜母以登堂直恐太君或留賓而剗薦否

則吾邱請假翁子言歸結望雲之悠悠慰倚閭於暮  
暮團團骨肉訴將客子光陰半老鬚眉記取童年啼  
笑豈不一官藉手二老開顏也哉天只人只竟忍愛  
而割慈是耶非耶宛依魂而來夢彩絲續命孤負佳  
名慈竹平安黯澹殘字桐杖扶而難起苦剪塊其獨  
居林鳥嗷嗷母將雛兮似舊臯魚惻惻風撼樹兮無  
休嗚呼哀哉然而塵世劫灰浮生泡影半世雙棲之  
福五花疊錫之榮石麟之子將並步於金鰲銀鹿之  
孫早自綴其蠟鳳心也可慰沒而斯寧某等得侍鳳  
雛許攀龍尾依粲粲之門子玉倚以葭憫樂樂之棘

人莪視爲蔚敢陳桂醕兼薦蘭肴彤管芬芳待寫宣  
文君之傳素雲縹緲欲邀西王母之車

祭莆陽義冢文

嗚呼高原草樹文通寫恨之時華屋山邱子建鍾情  
之語况乃他鄉冷節幾樹棠梨萋草頽垣一盂麥飯  
者乎伏惟靈等或飄零冠劍或落拓簪裾或彈鋏而  
客薛公之門或擊筑而過荆卿之市馬空得骨豹不  
留皮振世界以風輪寄人生於石火又若佳人紫玉  
童子青箱潘黃門哀逝之文庾開府傷心之賦莫不  
蘭燒玉折枿掩藤埋更有如願侍兒宜祿奴子柳子

厚骨掩張進褚愛孫誌托清娛雞犬皆飛與神仙而  
同劫鼯鼯來弔且邱壠之就平嗚呼背無三甲難言  
斟雉之年力卽五丁莫挽隄烏之駕佛膺靈鼠空貽  
明道以長生仙足明瞻幾見羿妻之不死所悲者嬰  
杓無返楸樹遽藏丁沾悵歸客之舟丙舍隔先人之  
隴青州世子姓氏埋冥黃絹外孫碑碣摧缺此則東  
平之樹有西靡之枝元邱之狐多正首之羨者矣然  
而季子葬於贏博朱邑旅於桐鄉漢書之傳楊終魏  
略之美沐並重泉銅鐵經年卽冥漠之君劫火燒灰  
大地亦虛空之影則知青山是處白首任埋玉局所

言金版可治也已下官濫竽東觀奉筆西清謂桑梓  
之必恭覲蒿萊而增感例大夫以祀厲沿東郭之祭  
墦白曉千山青春二月鬼猶求食庶幾胖蠶飛來魂  
無不之曷弗杜鵑歸去

郭大理遺稿卷六終